

PM: Guna jawatan majukan

JM 7 MAR 2002

PUTRAJAYA 6 Mac — Datuk Seri Dr. Mahathir Mohamad mengingatkan anggota pentadbiran kerajaan supaya tidak menganggap jawatan bertaraf tinggi yang disandang mereka sebagai landasan untuk menjalani kehidupan yang lebih baik.

Sebaliknya, Perdana Menteri menegaskan, mereka perlu memberi komitmen sepenuhnya ke atas pentadbiran negara dengan menggunakan jawatan dan kuasa itu demi memajukan negara.

“Saya yakin selagi sifat ini ada pada kita (anggota pentadbiran), insya-Allah Malaysia akan terus berjaya,” katanya ketika berucap pada Majlis Menandatangani surat Akujanji oleh anggota-anggota pentadbiran kerajaan di Jabatan Perdana Menteri di sini hari ini.

Mereka yang terdiri daripada menteri Kabinet, timbalan menteri, setiausaha Parlimen dan setiausaha politik menandatangani surat Akujanji di hadapan Perdana Menteri.

Penyerahan surat Akujanji yang ditandatangani itu kepada Dr. Mahathir kemudian dilakukan secara simbolik oleh wakil-wakil anggota pentadbiran.

Menteri Pengangkutan, Datuk Seri Dr. Ling Liong Sik menandatangani bagi pihak menteri-menteri Kabinet manakala Timbalan Menteri Penerangan, Datuk Khalid Yunus mewakili timbalan-timbalan menteri.

Setiausaha Parlimen di Jabatan Perdana Menteri, Datuk Kamsiyah Yeop mewakili setiausaha-setiausaha Parlimen sementara Setiausaha Politik Perdana Menteri, Datuk Johari Baharom mewakili setiausaha-setiausaha politik.

Dr. Mahathir menandatangani surat Akujanji di hadapan Yang di-Pertuan Agong, Tuanku Syed Sirajuddin Tuanku Syed Putra Jamalullail di Istana Negara, pagi ini.

Dr. Mahathir berkata, cara pentadbiran yang dilakukan oleh kerajaan adalah jauh lebih baik berbanding pentadbiran yang dilakukan negara-negara lain.

Menurut beliau, anggota pentadbiran kerajaan terlibat secara langsung dalam pelaksanaan keputusan dan tidak menyerahkan kepada orang lain untuk melaksanakannya.

“Saya telah berjalan ke seluruh dunia dan teliti cara pentadbiran di negara lain dan kita mendapati cara kita adalah cara yang baik,” katanya.

Dr. Mahathir berkata, cara yang dilakukan oleh kerajaan itu telah menjadikan negara ini mencapai lebih kejayaan berbanding negara-negara membangun yang lain.

Pencapaian

Menurut beliau, kejayaan negara keluar dari masalah krisis ekonomi pada 1997 dan 1998 merupakan contoh keberkesanan cara pentadbiran yang dilakukan kerajaan.

“Tiap-tiap hari kita semak pencapaian dan angka-angka yang menunjukkan prestasi kita. Apabila didapati prestasi kurang baik dalam mana-mana segmen ekonomi, kita akan memikirkan cara-cara mengatasinya dan kita tentukan ia dilaksanakan,” katanya.

Dr. Mahathir berkata, dalam menghadapi kemelut ekonomi ketika itu, Malaysia telah melakukannya bersungguh-sungguh menerusi beberapa pendekatan yang diputuskan oleh kerajaan.

“Kita fikir tentang pendekatan yang patut dilaksanakan, kita cuba (laksanakannya). Jika kita dapat ia kurang berjaya, kita tidak segan-segan untuk mengkaji semula dan memikirkan cara baru,” katanya.

Mengenai surat Akujanji, beliau berharap anggota pentadbiran menandatangani dengan niat ikhlas meskipun sebelum ini mereka telah pun membuat akuan bersumpah memegang jawatan.

“Ini sebagai satu pengakuan akan niat kita untuk menjalankan tugas dengan sebaik mungkin. Ia bukan bermakna kita sebelum ini tak jalan tugas dengan baik tapi walau bagaimana baik sekalipun, masih ada ruang untuk membaiki lagi prestasi kita,” katanya.

negara